

清·方略館 編

清代 方略 全書

北京圖書館出版社



清代方略全書

七四

清·方略館編

北京圖書館出版社

清·慶桂等撰

欽定剿平三省邪匪方略

正編卷一七八——一八七

清嘉慶十五年（一八一〇）武英殿刻本

欽定剿平三省邪匪方略正編卷一百七十八

庚申年

五月初一日

壬午

德楞泰奏言

臣

等於燈草壩追

剿藍號等逆當由開縣趙家場前進沿途日有

斬獲該逆被剿情急遂分股牽綴我兵一竄雲

陽一竄梁山忠州正在分兵追剿據涪州豐都

長壽江北廳沿江各州縣先後稟報劉朝選湯

思蛟股匪由鶴遊坪分竄江岸意欲窺伺大江

南渡臣查竄赴雲陽之賊所向多係老山箐林

其勢稍緩長壽涪州酆都一帶在在濱臨大江客商船隻往來不絕各州縣雖有防備恐不足恃前派總兵許文謨等兵力又單若無大兵剿辦設各股併合搶渡南岸完善之區肆其擄掠又復蔓延難制且藍號分股亦由忠梁而去酌其輕重先當以廓清江岸爲急因卽札飭許文

謨副將託雲泰遊擊李東山等帶領兵勇三千
餘名經由梁山忠州緊跟藍號賊蹤追剿

臣

正

在督兵向長壽一帶進剿途次探得賊匪劉朝
選等聞官兵將到已向西北折竄因查詢道路
如改道由隣水進發即可迎頭兜截十七日行
抵該縣所屬之合流水地方接據探報該匪等
率衆四五百人由江北廳屬之茨竹林一帶前

來其勢將入隣水界內十八日夜雨如注

臣恐

賊匪聞風先颺卽冒雨於五鼓帶兵由星拱橋
進發已刻至七孔溪山梁遙見逆衆從高難場
而來該處山林茂密賊匪尙無准備我兵正可
出其不意痛加殲殺當令賽沖阿溫春阿穆勒
塔色爾滾李紹祖達勒精阿薩寧阿富僧德蘇
勒芳阿馬瑜倭星額等帶領兵勇分伏於兩山

旁樹林內觀看賊匪蜂擁過溝上至半山官兵
突出從上壓下勢如破竹賊匪大形潰亂我兵
箭射矛戳登時斃賊四百餘名並有棄械跪求
馬前者三百二十六名當卽給票釋令歸業其
敗竄殘匪經兵勇極力追殺墮落溝澗死者不
計其數生擒向吉秀張周氏等男婦七百七十
八名口雨勢愈大官兵緊追至江北廳屬之秦

家場沿途又殺賊三百餘名生擒余志俊陳姚氏等男婦三百六十三名口渙散者甚多餘匪不過千餘人翻任家壩新店子向岳池廣安交界遁逃隨卽委員研訊各獲犯內有大竹縣差役張禮夏魁供出該縣張位中被害係軍師何上達戳死並據屠有華汪國忠等亦指認何上達係營中總管又認出探馬頭周仁乾並戰手

探信各匪犯劉廷俸等二百零二名何上達始
猶狡賴經衆質証俯首無辭查該逆在營主謀
慘殺良民戕害職官肆行荼毒實爲罪大惡極
臣卽令繕寫陣亡大竹縣知縣張位中牌位委
知縣喻日泗前往將該逆凌遲致祭以彰

國法而慰忠魂軍民無不稱快其餘匪周仁乾等
二百零三名概予駢誅擒獲各犯多係附近州

縣被擄之人仍給銀米路票並良民旗號按籍
遞遣歸業查劉朝選等率其餘匪竄向岳廣勢
必徑趨大竹等處若大兵全行跟躡而去則許
文謨現追藍號之賊據稟已擾至忠州皮家廟
箐口地方距江岸亦不甚遠若一時不能得手
恐沿江倘有疎虞所關尤重臣現卽酌派總兵
李紹祖副將倭星額遊擊楊國林等帶兵勇三

千餘名緊跟劉朝選等賊匪追剿並卽飭知許
文謨仍跟藍號賊蹤臣帶領大兵卽取道忠州
一帶探查賊匪現向何處冀與該鎮兩面夾擊
或可盡數剿除奏入

帶領大兵卽取道忠州

上命軍機大臣傳諭德楞泰曰此次德楞泰督兵追剿藍號等逆因劉朝選湯思蛟等匪分竄江岸意欲窺伺大江偷渡隨飭總兵許文謨等帶兵由梁

山忠州緊跟藍號賊蹤追擊德楞泰卽於隣水進發將劉朝選等乘勢剿殺冒雨追擊先後斃賊七百餘名生擒男婦千餘名復經兵勇曉諭棄械投出者三百餘名並究出前此戕害知縣張位中之僞軍師何上達凌遲致祭並將被擄民人分別遞遣歸業所辦俱好此次捷報馳到正值五月朔日著賞給德楞泰香囊扇袋荷包以示恩眷並發去

香囊三十個著交德楞泰賞給軍營出力之侍衛
官員等至德楞泰因劉朝選等賊匪欲圖窺伺大
江先以廓清江岸爲急隨卽帶兵追剿其辦理緩
急機宜朕亦不爲遙制惟劉朝選等餘匪千餘仍
未辦竣向來各路官兵每因剿辦一股未能剿淨
任餘匪竄入深山老林蓄養休息旋又裹脅多人
分路肆擾卽如劉朝選敗散匪黨此時雖不過千

餘人將來潛出滋擾又將隨處裹脅自必不止此數是此股賊匪雖經剿殺而旋散旋聚餘孽復萌或致又成大股與未經剿殺何異德楞泰剿辦川省賊匪務須將所剿一股悉數殲除再將別股以次撲滅方不至蔓延爲害此次官兵冒雨進擊並分伏山旁乘勢截剿實屬勞苦出力但此股賊匪究未剿竣未便卽予恩施所有出力各員弁著德

楞泰存記俟將來大獲勝仗時一併保奏候朕酌
量加恩前據德楞泰奏稱川東川北賊匪共有九
股現在劉朝選等一股是否卽在九股之內其餘
賊匪俱在何處竄擾尙有若干雖賊蹤或分或合
往來無定而大概賊股情形自可約畧而計並著
德楞泰查明具奏德楞泰身任成都將軍川省剿
辦事宜皆其專責惟糧餉供支團練鄉勇則爲勒

保專辦之事德楞泰務當悉心籌辦並遵照節降諭旨裁減疲病無用之弁兵撤令各歸營伍至召募鄉勇一項最爲有名無實其雇募之費旣較兵丁得項爲多且一經離鄉卽不爲勇若令隨征打仗焉望得力而伊等遠離鄉里或聞其本住村莊被賊滋擾未免心存惶惑轉致搖我軍心是雇募之不若團練遠甚德楞泰當與勒保會商妥辦並